

1287-1287- OFP - Acta Capitulum Generalium Burdegale Celebrati

Acta capituli generalis Burdegale celebrati
anno Domini · M° · CC° · LXXXVII° ·

Confirmamus has constitutiones. In capitulo de domibus concedendis et construendis. ubi dicitur. cura vel custodia monialium. seu quarumlibet aliarum mulierum. addatur. nisi de licencia magistri ordinis specialiter. Et hec habet · iii · capitula.

Item hanc. In letania. ubi dicitur. sancta Katerina. addatur. sancta Margareta. ora pro nobis. [Et hec habet · iii · capitula].

Iste sunt approbaciones.

Approbamus hanc. In capitulo de electione prioris provincialis. ubi dicitur. quod dictum scrutinium alicui per modum aliquem non revelent. addatur. quod si aliquis. vel aliqui de dictis scrutatoribus prioris provincialis impedimentum habuerit. iudicio maioris partis conventus ad audiendum vel videndum seu scribendum ea. que in scrutinio deponuntur. unus de fratribus ad electionem ipsam pertinentibus. quem ut dictum est. maior pars conventus nominaverit. loco illius. qui impeditus fuerit; ad recipiendum dictum scrutinium admittatur. et tunc ad servandum scrutinium ex vi precepti; ut alii teneatur. et hec eadem forma circa scrutinium electorum prioris provincialis. et electionis prioris conventualis; in omnibus observetur. Et hec habet · ii · capitula.

Item. Approbamus. quod conventus Duracenus; ad provinciam Ungarie transferatur. Et hec habet · ii · capitula.

Iste sunt inchoaciones.

Inchoamus has. In capitulo de apostatis. in fine ubi dicitur. fuerit restitutus. addatur. que restitucio non fiat per eosdem; ante tres annos ad minus.

Item hanc. In capitulo de domibus concedendis. ubi dicitur. hac eadem districtione precipimus. usque ad illud. ordini committatur. deleatur totum et dicatur sic. prohibemus districte. ne aliquis curam recipiat predictarum; nisi per tria capitula generalia fuerit approbatum. et cura nisi per dominum papam ordini committatur. vel per alium. qui possit facere commissionem predictam.

Item hanc. In eodem capitulo. in fine addatur sic. quinque autem provincie scilicet. Hispania. Provincia. Lombardia. Romana provincia et Polonia dividantur. ita quod quelibet earum dividatur in duas. si vero relique provincie vel alique ex ipsis. exceptis provinciis Grecie et Terre sancte. dividi voluerint et peccerint; in eodem tercio capitulo. in quo hec constitucio fuerit confirmata; quelibet earum in duas modo simili dividatur. Quam divisionem magister ordinis et diffinitores capituli generalis immediate sequentis. postquam hec constitucio fuerit confirmata. facere teneantur et faciant. secundum modum a singulis provinciis dividendis eisdem tradendum. quem modum ipse provincie dividende tradere teneantur; infra nominatum capitulum immediate sequens. post confirmationem predictam. Et si alique provincie in modum divisionis non convenerint; duos fratres mittere teneantur et mittant. qui in dicto capitulo generali referant magistro et diffinitoribus. que circa divisionem viderint expedire. Quod si modum divisionis predictae magistro et diffinitoribus infra predictum tempus non presentaverint; nichilominus ex tunc dicti magister et diffinitores ad divisionem procedant; et nomina ipsis divisio provinciis imponant.

Item hanc. In eodem capitulo. immediate post premissa. volumus autem. quod provinciis divisio modo predicto illa provincia. ubi primo fuit conventus fratrum; retineat locum suum consuetum in capitulo generali. relique vero post provinciam Grecie in choro dextro. et ultramarinam¹ in choro sinistro habeant locum suum. ita quod novus provincialis Hispanie sit primus post provinciam Grecie in choro dextro. et novus provincialis provincie Provincie. sit primus in choro sinistro post provinciam Terre sancte. et similiter omnes provinciales alii collocentur.

Item hanc. In capitulo de capitulo generali. in fine addatur. capitulum generale uno anno intermittatur. et sequenti anno celebretur. et quicquid contra formam huius constitucionis repertum fuerit in constitucionibus. per diffinitores generalis capituli. in quo hec constitucio confirmabitur. removeatur.

Iste sunt admoniciones.

Ordinamus et volumus. quod magistri in theologia. actu regentes Parisiis. non se absentent tempore lectionum vel vacationum a conventu. nisi forte per tres septimanas. vel per mensem ad plus. pro causa necessaria. et hoc de licencia magistri ordinis vel prioris provincialis Francie. ita tamen quod alter ipsorum; semper remaneat in conventu.

Item. Magister ordinis de consilio diffinitorum precipit in virtute obediencie fratribus universis. quod in aliquibus non studeant. nec doceant. nec aliquatenus operentur. nec aliqua scripta de illa sciencia teneant. sed prioribus suis restituant quam cicius poterunt. bona fide. per eosdem priores prioribus provincialibus assignanda. et qui contra hoc de cetero fecerint et deprehensi fuerint. aut convicti; preter penam inobediencie. carcerali custodie mancipentur¹.

¹ Eadem admonitio iam anno 1273 data est

Item. Volumus. quod priores provinciales singulis annis provideant fratribus suis missis extra provinciam ad studendum de libris fratrum morientium. si non habent aliunde. unde possint eis commode providere.

Item. Prohibemus districte. ne aliquis frater de cetero intromittat se de matrimoniis consiliandis. aut pertractandis. seu etiam magnis et arduis negociis secularium. sine prioris provincialis. vel eius vicarii; licencia speciali. et qui contra fecerint; per priores et visitatores severius puniantur.

Item. Quia quidam vicarii. vacante officio provincialium multas mutaciones facere presumpserunt contra ordinacionem capituli generalis Vienne celebrati. volumus. quod de cetero caveant a mutacionibus fratrum. usque ad confirmacionem priorum provincialium. nisi ex dilacione videretur periculum imminere. et si secus fecerint; priores provinciales. cum fuerint confirmati. inordinatas assignaciones factas per eosdem studeant revocare. et nichilominus in provinciali vel generali capitulo; puniantur².

Item. Ordinacionem factam in preterito capitulo generali³ de inductionibus non faciendis. temperantes. prohibemus districte prioribus et fratribus universis. ne faciant aliquas inductiones in electionibus ordinis quocumque modo. qui vero contrarium fecerint. et in hoc fuerint deprehensi; voce per triennium sint in omni electione privati. ita quod nec eligi nec eligere possint. et per illud triennium singulis sextis feriis abstineant in pane et aqua. nec in hoc aliquis. nisi prior provincialis vel eius vicarius valeat dispensare. et super hoc visitatores inquirent diligenter et referant cum testimonio seniorum fratrum de conventu. ad capitulum generale vel provinciale; si quos invenerint excessisse.

Item. Volumus et ordinamus. quod subpriores in socios priorum ad capitulum provinciale; nullatenus eligantur.

Item. Litere misse prioribus et conventibus. non aperiantur nisi in presencia priorum et conventuum; quibus litere diriguntur.

Item. Iniungimus prioribus conventualibus universis ac eorum vices gerentibus. quod fratribus indigentibus in vestibus et necessariis; singulis annis. studeant providere.

Item. Quia circa infirmos diligens cura est adhibenda; eisdem prioribus et eorum vicariis districte iniungimus. quod fratribus infirmis in medicinis et aliis necessariis. secundum quod infirmitas eorum exigit; provideant diligenter.

Item. Prohibemus districte. ne aliquis frater de cetero veniat ad capitulum generale. vel provinciale. vel ad loca propinqua capituli; sine magistri ordinis vel prioris sui provincialis licencia speciali. et qui de cetero contrarium fecerint; statim eiiciantur de loco capituli. et nichilominus iniungatur eis penitencia; secundum suorum exigenciam meritorum. et priores provinciales non sint faciles ad tales licencias concedendas.

Item. Ordinacio capituli Pisani. de non recipiendis professis aliorum ordinum. diligentius observetur⁴.

Item. Magister ordinis concedit prioribus provincialibus. quod possint mittere unum fratrem ydoneum pro suarum provinciarum negociis ad curiam Romanam. quem etiam. cum voluerint. poterunt revocare.

Concedimus provincie Romane · i · domum ad preces domini Thome de sancto Severino comitis Massini. ponendam in terra ipsius.

Concedimus provincie Lombardie · i · ponendam in Clugia.

Provincie Theotonie; · iii ·

Provincie Polonie; · iiiior · et ponantur omnes. ubi prioribus provincialibus dictarum provinciarum. et diffinitoribus capitulorum provincialium videbitur expedire.

Item. Letania more solito dicatur immediate post matutinas. dicto fidelium et pater noster.

Absolvimus priores. Bayonensem. Morlanensem. sancti Emiliani. Narbonensem. Biterrensem. Nemausensem. Aquensem. Massiliensem. Grassensem. Altivillaris. Caturcensem. Appamiensem. Petragoricensem. Castrensem. Marologii. Podiensem; Amiliavi. Arausicensem. Bituricensem. Diensem. Iste sunt penitencie.

Quia multi conventus Francie nobis suis literis intimarunt. quod quidam fratres eius provincie acuerunt linguas suas in derogacionem fame venerabilis patris magistri ordinis. falso effundentes et disseminantes de ipso quedam. de quibus idem magister est omnino innocens et immunis; ordinamus et volumus. quod fratres Hugo(nem) de Villasana. R. de sancta Feva. Io. de Arenes. quos prior provincialis Francie propter huiusmodi linguarum suarum lubricitatem et detractionem de suis emisit conventibus. non redeant ad eosdem. et sint omni voce privati; nisi in sui accusacione nec ad alios tractatus ordinis admittantur; donec per generale capitulum fuerint restituti. · xii · insuper diebus abstinebunt in pane et aqua · xii · missas et · xii · disciplinas recipient. Et iniungimus priori provinciali Francie. quod in sua provincia super quibusdam fratribus. qui nobis de predicto excessu fuerunt delati. et etiam de aliis fratribus inquirent diligenter. et si quos invenerit deliquisse. similiter vel etiam gravius puniat. si gravius excesserunt. ne tantus excessus remaneat impunitus.

Item. Iniungimus omnibus fratribus qui venerunt ad capitulum generale sine licencia; · vii · dies in pane et aqua · vii · letanias. et · iii · psalteria. et sacerdotibus · vii · missas.

Item. Rogamus magistrum ordinis. ut quam cito poterit mittat Parisius aliquem fratrem. vel aliquos. qui auctoritate sua inquirent de quibusdam studentibus. nec non et aliis. qui dicuntur nuper turbacionem fecisse in conventu Parisiensi. et secundum quod invenerint; acrius puniant turbatores. et si eis visum fuerit; pro pace dicti conventus possint studentes extraneos ad suas provincias remittere ac etiam alios mutare et emittere de conventu; et a suis officiis absolvere.

Item. Omnibus. qui non servaverunt sententias iudicum per generale vel provinciale capitulum approbatas; iniungimus · vii · dies in pane et aqua. et per visitatores et priores provinciales; facere compellantur penitencias supradictas.

Volumus et ordinamus. ut priores absoluti hoc anno in capitulo generali ad eadem officia in eisdem conventibus hoc anno nullatenus resumantur.

Committimus magistro ordinis ordinacionem studii Parisiensis. et aliorum studiorum generalium. ut ipse de magistris et bacallariis ordinet et disponat. prout generali viderit utilitati ordinis expedire.

Volumus et iniungimus. quod diffinitores generalis capituli presentis et futuri. in redeundo et veniendo deducantur de conventu ad conventum; et provideatur eis secundum morem ordinis consuetum.

Absolvimus priorem provincialem Anglie G. de Odone et assignamus eum conventui Parisiensi; ad legendum.

Sententias iudicum approbamus.

Sequens generale capitulum assignamus apud Lucham in provincia Romana. diffinitores autem sint ibi dominica infra octavas ascensionis.

Nullus autem aliorum fratrum. eciamsi licenciam habeat; intret locum capituli ante sextam feriam precedentem vigiliam penthecostes.

Actis additae sunt litterae magistri ordinis; cf. app. n. XXXVIII.